

1784

LES IVSTES  
COMPLAINTE S  
DES  
BOVRGEOIS  
DE PARIS.  
ADDRESSEES A MESSIEURS  
DV PARLEMENT.



A PARIS,  
Chez CLAUDE BOUDEVILLE, rue des Carmes,  
proche Saint Hilaire au Lys Fleurissant.

M. DC. XLIX.

*Avec Permission.*



REVIEWS  
OF THE

DEPT

BOVINGE

DEPT

REVIEWS

REVIEWS

REVIEWS

REVIEWS

REVIEWS

REVIEWS

REVIEWS

REVIEWS

REVIEWS

REVIEWS

REVIEWS





# LES IVSTES COMPLAINTE S

des Bourgeois adressées à Messieurs.

du Parlement.

**L**Es Historiens remarquent que de tous les malheurs qui accompagnerent la captiuité des Israélites, le plus estrange fut celuy, de n'auoir pas la liberté de les pleurer, & d'estre contrainsts de donner de l'argent aux Soldats qui les gardoient afin d'auoir la permission de se plaindre. Iamais malheureux ne répandirent moins de larmes, ny de plus pretieuses dans l'extremité de leur misere. Et saint Chrysostome parlant des larmes de ces pauvres captifs, dit quelles estoient achetées à prix d'argent, *emptitiæ lachrymæ*. S'il est vray ce que dit Iob, que l'homme soit vne Image de misere & d'inconstance, la Nature qui luy a formé vne langue, la luy a donné autant pour plaindre ses disgraces, que pour exprimer ses ioyes! S'il a des yeux, c'est autant pour déplorer ses propres infortunes que pour considerer celles d'autrui: & s'il a des mains, c'est autant pour apporter du remede à son mal, que pour resister à la violence de ceux qui auroient dessein de luy en



faire. La Nature donc nous enseigne à nous plaindre : & si c'est vne iniustice que d'affliger les malheureux, c'est vne cruauté, d'empescher qu'ils n'en ayent du ressentiment. Permettez donc, Messieurs, que nous nous plaignions, & si vous n'estes resolu de soulager nos malheurs, ne nous refusez pas au moins de leur donner des larmes, & de dire nos sentimens. Oüy Messieurs, c'est trop languir sous la violence d'une iniuste tyrannie? c'est trop conferer avec vn Ennemy qui n'a dessein que de vous surprendre, & qui cherche dans ces longueurs la precipitation de nostre mort; c'est trop de force à vne Puissance qui se veut rendre absoluë aux despens de nos biens & de nos vies : & qui n'a autre intention que de s'élever dessus nos ruines. Il est de droit naturel d'opposer la violence à la violence, de faire perdre la vie à ceux qui vous la veulent oster, & de ne plus connoistre les Princes qui pretendent la perte de leurs Sujets. Les peuples sont seruiteurs de leurs Roys, mais ils ne sont pas leurs esclaves, & si nous deuons le respect & la soumission à leurs Majestez, elles nous doiuent reciproquement la Iustice, qui veut que l'on rende à vn chacun ce qui luy appartient. En matiere d'Estat il ne faut pas tant considerer, & les fautes que l'on  
 .commet



commet en des affaires d'importance sont toujours irreparables, & de grandissime consequence. N'auons-nous pas vn extrême sujet de nous plaindre lors que nous considerons, que nous auons à craindre & dedans & dehors, que l'interieur est plus malade que l'exterieur, que Paris est plus affligé que la moindre Ville du monde, & que de quelque costé que nous nous tournions nous auons des Ennemis à vaincre, & des traistres à combattre. Les Pauures qui sont dans l'enceinte de nos murailles meditent à tous momens vne sedition épouuantable, & le desespoir qui commence à s'emparer de leurs cœurs leur persuade que le dernier remede à leurs maux est de n'en plus chercher, & qu'ils ne seront iamais plus heureux que quand ils auront fait des miserables, & perdu les honnestes gens : la derniere esperance des miserables est de n'en plus auoir, & nous ne sommes iamais plus hardis que quand nous n'auons plus rien, ny à craindre, ny à esperer, pour lors nous n'apportons plus de moderation en nos desseins, plus de prudence en nostre conduite, plus de retenuë en nos actions, & dans l'aveuglement de nostre raison preoccupée, nous faisons choix mesme des choses qui nous sont nuisibles & qui sont capables de nous perdre.



Vousſçauz, Messieurs, que les Viures ſont en-  
 tierement chers à Paris, que les Passages bou-  
 chez en empeschent la communication, & que  
 nous n'en pouuons plus auoir, ou que tres diffi-  
 cilement, ou qu'à vn prix qui estant excessif pour  
 les personnes de mediocre condition, ſera dans  
 peu de iours impossible aux mercenaires & aux  
 artisans. Non, non, Messieurs, il ne faut plus dif-  
 férer ! il faut vaincre ou mourir, auoir la Paix ou  
 la Guerre absolument, & en vne affaire de telle  
 importance, ne raisonner que vingt quatre heu-  
 res au plus, & apres cela prendre les Armes, ou se  
 ſoumettre : executer courageusement ce qu'on  
 aura resolu, & ne point démordre de son entre-  
 prise, que les choses ne ſoient en estat de ne plus  
 souffrir de changement. N'est ce pas vn objet  
 digne de larmes & d'estonnement, de voir que  
 la Ville de Paris ſoit bloquée par vne poignée de  
 gens : que celle qui a resisté si long-temps au plus  
 puissant Monarque du monde, ne puisse faire  
 teste à vn Prince qui la veut ruyner, & que tant  
 de Citoyens qui la composent & qui ſont si vail-  
 lants n'ayent pas la liberté, ou le cœur de la def-  
 fendre. Sçachez, Messieurs, que de la perte de  
 Paris dépend celle de tout le reste de la France,  
 & que les naturels Parisiens passeront, ou pour



lasches, ou pour traistres dans l'esprit des François, aussi bien que des Nations estrangeres s'ils ne témoignent plus de resolution & de generosité. Pourquoy pensez vous que la Ville de Paris porte en ses Armes vn Nauire & deux fleurs de Lis, c'est pour témoigner & quelle est bastante de resister à toutes les attaques de ses Ennemis, & qu'elle renferme en soy les deux tiers de la France. Si donc ce grand Vaisseau qui se iouë des vents & des orages vient à perir, que deuons-nous attendre sinon qu'un naufrage vniuersel : & si ces belles fleurs viennent à se ternir que deviendra le reste de la France, sinon vn desert plein de ronces & d'espines, que les hommes ne voudront plus habiter. Oüy, ouy, Messieurs, nous auons trop suiet de nous plaindre de vos longueurs, & il est à craindre qu'en differant trop, le mal deuienne sans remede, & les Bourgeois sans secours. N'auetz vous pas interest à conseruer vne Ville qui fait vostre fortune & vostre gloire, & qui vous rend recommandables à tous les autres Parlemens de France. Mais peut elle perir sans que vous soyiez enseuelis dedans ses ruynes: pouuez vous subsister sans qu'elle se tienne debout, & vous persuader pouuoir estre heureux lors qu'elle sera miserable. Enfin, Messieurs, prenez



garde que l'on n'attende plus vos resolutions, & que les Bourgeois animez ne se vangent eux mesmes des torts que l'on leur fait, sans considerer, ny la dignité, ny la puissance de ceux qui en sont la cause.

F I N.